

四庫全書

集部

欽定四庫全書

集部

雲溪集卷一  
三至

詳校官左中允<sub>臣</sub>瑋五珠

主事<sub>臣</sub>呂雲棟覆勘

謄錄貢生<sub>臣</sub>王 穀

謄錄監生<sub>臣</sub>汪 麟

欽定四庫全書

集部四

提要

雲溪集十二卷

別集類三 宋

臣等謹案雲溪集十二卷宋郭印撰印詩數百篇散見永樂大典各韻中皆題曰雲溪集而宋史藝文志及諸家書目均未著錄惟厲鶚輯宋史紀事載印為成都人政和中進士而亦不詳其官爵所錄詩僅二首一從全蜀

藝文志摘出為遊大隋山詩一從四川總志  
摘出則即集中遊下巖寺詩是也今按集中  
有雲溪雜詠小序自題亦樂居士且稱性嗜  
水竹經營二十載始得一畝之園云云則雲  
溪乃其別墅之名又有過銅梁縣詩云攝職臨  
茲邑於今五十年又仁壽縣山齋詩云隨牒  
幾推遷銅章領巖邑又次韻宋南伯云衰遲  
來作邑勞苦劇萬狀則嘗累任縣令晚始退

居又贈劉元圭詩今年歲八十之語則其齒  
亦躋上壽觀所作養生歌及讀易詩蓋有得  
於導引之術者其交游最密為曾慥計有功  
等皆一時博雅之士則印亦勝流矣特以集久  
不傳故錄宋詩者遂罕能稱述耳今據永樂  
大典所載分體編輯釐為十二卷其詩才地  
稍弱未能自出機杼而清詞雋語辭香實在  
眉山以視宋末嘈雜之音固為猶有典刑矣

乾隆四十六年九月恭校上

總纂官

臣

紀昀

臣

陸錫熊

臣

孫士毅

臣

總校官

臣

陸

費

墀

欽定四庫全書

雲溪集卷一

宋 郭印 撰

四言詩

和仲長統詩二首

造化一機乾坤一殼死生蟲臂勝負蝸角達人於道混  
混殊俗瞽非喪明刖非卞足賊生戶牖禍徵帷幄聚蟻  
貪羶飛蛾赴燭彈雀以珠抵鵲以玉喪精失靈皆由多  
欲命也天齊愚夫自促

致虛守靜其術至寡有相皆虛無物不可包藏寥廓該  
攝細瑣出入隱顯妙用由我九天匪高九地匪下駕鶴  
周遊魚魚雅雅焚蕩三彭性空真火大道甚夷學孝僻  
左發車推轅捨舟搖施五金八石殘生爐冶

五言古詩

蜀州試闈登樓西山巍然可愛因用試舉子股  
肱蕭曹詩肱字韻賦詩一篇呈同舍

棘闈倦羈束何異韝上鷹突兀有高樓寸目堪遠凝雨



殘空正霽暑盡秋初澄西山橫一天奇峯矗層層素約  
念樵子煙霞同曲肱口腹在塵土擺脫良未能高低久  
隔絕氛霾尚薰烝唯有岷峨秀宇宙誇峻嶒或悵碧雲  
合或瞻紅日昇危欄朝暮意拉君時一登

類試院考校九月十日塔之八級中現寶光楊  
齊伯有詩記其事亦賦一首

崢嶸大千界等是菩提鄉昆蟲暨草木各放無邊光而  
况佛之覺靈明亘十方化身三昧火骨節金彌剛累累

燦五色珠璣斗斛量寶傳百世後伽藍深秘藏錦官岌  
浮圖直上千穹蒼中有堅固子示現尤非常朝來八級  
內明燈忽煌煌胥隸走驚詫觀者即堵牆初疑伏螢過  
顯沒何微茫繼如兩星出左右爭飛揚是時霽霧歛若  
木昇太陽儻非照耀成不知果何祥西南一都會廣開  
選士場定應得奇才歸美報君王

臨都試院考校已畢諸公尚恨遺才勉作數語  
釋其意

平時參與商會遇何由緣相從棘闥中再見月之弦歡  
然臭味合言笑浩無邊論事快今古談玄貫天淵白袍  
閱多士燈窗極精研所得乃溢數無路能周旋躊躇不  
忍舍在野恐遺賢我時職監視日食亦千錢一言為訂  
正少逌饕餮愆譬如滿盤珠差擇先光圓又如采美玉  
疵瑕終棄捐茲事既不免吾心白日懸羣公人中傑行  
筵蓬瀛仙願開取士額條畫奏上前

迂帥夜渡廣漢

負弩迎使車暮塗頗忽迫篝火滅還明羸駕費鞭策行  
行漢江濬月照沙水白登舟越驚濤未濟忽歎側可憐  
為升斗性命鴻毛擲人生誰貴賤同是蘧廬客敢輕千  
戶侯願丐五畝宅歸共老農遊飲酣歌帝澤

早行界上逐何使者

天星半牢落月窗光罔罔僮婢寐正酣四鄰雞犬靜而  
我獨何之倒衣不及整呵鞭驅蹇驢霜風破裘領既無  
王事敦又匪奉朝請窮年憊將迎功業羞明鏡相如徒

四壁季子無二頃何時滌塵纓農畝迹甘屏

上李西美制置

諦觀天地間物物無非易有情洎無情與我固真一伏  
義未仰俯卦象已先畫乾坤易之門神機盡開闢周文  
魯仲尼傳授何太密古今元共處心心印空寂展編韋  
三絕門人豈語詰曾高本愚魯超然入于室子思中庸  
篇孟軻仁義術于易初不言此道皎如日寥落餘千載  
學者空陳迹條葉競尋採幾人擷其實盤根有仙李靈

茅一枝出衣鉢自家傳獨智探聖域契茲三聖書羹牆  
面相覲雅懷親炙願進退終跼蹐達人具大觀胃次吞  
溟渤斐章露肝膽猶愧多言失儻許接玄談平生事已  
畢

送韓美成都大赴夔帥

公來雪山重公去雪山輕少陵有是語申言餞公行公  
初來蜀時豺狼浩縱橫剪除二三輩百獸弭耳驚坐令  
坤維地衆醉稍稍醒仁風被動植德澤覃幽明咸云真

使者有眼未曾經今將夔子去方面倚長城雖分閭外  
憂三川難為情岷山黯無色錦水咽無聲政恐狐狸出  
依然擾吾民鄙夫為之言汝曹且靜聽我公非常人夷  
夏知威名平生活國心須臾不少寧天欲靖乾坤平步  
公與卿大攄康濟學引手援生靈

送韓美成帥荆南

何國不生士汝頴獨多奇公於輩行中玉潔了無疵少  
年遊官場英譽蔚四馳郎宿爭璀璨使星勝光輝去惡

如去草根本須芟夷就義若就渴事難必勇為姦吏戢  
猛虎良民撫嬰兒髦節已歷試人訝鋒車遲遺愛猶在  
益去思今滿夔行行遠荊州迤邐近丹墀深嗟鷁首東  
孤猿失攀依愁看巫峽內江山氣慘悽但同此邦民日  
日誦清徽它年黃閣下簪屨或收遺

送种守

羣峯逶迤來落處如鼎峙真仙鑿鹽穴下引滄溟水英  
氣鍾人物衣冠何濟濟古來陵陽守賢哲多卧理公分



一歲符治譽歛然起鈴齋清晝閒山色入簾几璽書換  
金淵要踵前兄美跨鼇煙雲愁十日雨不止聞昔乃祖  
風勲業照國史尺箠鞭羌夷奇謀付孫子青雲且遇合  
未信朱輪柅行觀舊物歸一洗中原耻

### 送路守

道衰世彌隘俗薄人易驕一為居所移盛氣干雲霄官  
曹出已下俯視如焦僥崇卑兩懸絕相望天壤遼猗歎  
路漢州冠纓早影彰亨衢快著鞭壯歲亟乘軺耘耔於

色盡茂德日以昭揭來西南守揀拔自公朝侯館賓客  
富平湖水竹饒退食未為樂鸞輿萬里遙赤子拊吾民  
良朋遇吾僚薰然四時春草木無枯焦明朝馬首西秋  
風更蕭條當宁方急賢三旌副旁招

詩別杜安行赴合州守

雁水分攜後懸懸二十秋世路少青眼人生易白頭况  
復遭亂離長懷家國憂是中欲傾倒一面終無由君從  
萬里歸訪我三日留寒燈話平生尊酒相勸酬喜極感

今昔潛然涕將流君行駕朱轡我亦稻粱謀努力盡此  
道全身早歸休林泉遵素約杖屨發清游庶幾踐前言  
母俾猿鶴羞

送董守

房相風流遠寥寥四百年西湖有陳迹水竹尚蒼然公  
來刺是邦魚鳥亦安全官閒得放曠樂事踵前賢亭臺  
一增飾草木發夭妍瓜期秋風來歲月驚翩翩長橋淡  
孤月老樹含愁煙賴有龐眉叟送行賫百錢

送陳守

惟昔號能吏在公勤嚴明挾茲來共理教化日流行堂  
堂陳漢州所至樹風聲四美出天性早擅循良名平心  
衡稱物敏手刀發硯姦黠膽欲破隱伏無遁形千里歸  
鎮靜人神各安寧愛物及魚鳥游泳全其生興言誦嘉  
政不待三年成房湖天下絕好景無陰晴退食來徜徉  
風月攬詩情脩竹如君直流水如君清豈無宴賞心對  
此樂事并國步正艱險天驕尚縱橫惜哉廊廟器乃爾

屈專城瓜期忽忽來歲月令人驚車轍不容卧去意一  
何輕金陵一水通當宁思豪英况最郡守課由來入公  
卿君才森武庫可當十萬兵行矣佐中興力扶天柱傾  
送雷公達觀赴召

我觀靖康初塵氛蒙帝闕君臣失上著社稷幾危絕君  
時沉布衣抗疏何悲切言聽豺狼誅狐狸肝膽裂鐵騎  
稍稍去佞諛歸一轍小臣更不容排擯爭媒蘖後來禍  
何如欲語氣先噎七年坐閉廢口舌宜鉗結技癢不復

禁囊封仍論列朝廷果召還愛士如飢渴魏闕心久馳  
行色安可遏江山阻且長忠信自平達露肘見天子首  
薦經綸說邦榮身亦榮無愧古明哲

送喻迪孺赴召

志士居環堵常懷天下憂而況立王朝為國當遠謀中  
原亂戎馬騷擾十三秋宮闕翳草莽井邑成墟丘先生  
身補外興言淚長流滿腹貯經綸寸絲殊未抽篇章洩  
幽憤山雲為之愁遂令寰海間望治空悠悠詔旨忽旁

招喜氣扶仙舟風濤照孤忠軒陛需嘉猷屈指在廷彥  
如公實罕儔片言儻遇合男兒志願酬方今艱難際皇  
祚若綴旒百蠹盡掃除羣黎自歌謳古來柔遠人莫先  
政事修要當效甫申豈但為枚鄒高堂有甲兵千里歸  
坐籌贊成中興功踵跡商與周

送吳蜀州還朝

達官眎貧賤遼絕間天壤門牆與莫窺鼎茵恣居享今  
行雷風前氣吐虹霓上陋彼衡門流揮斥同草莽堂堂

吳蜀州浩氣深涵養毫端掃千軍胃次包萬象驕色盡  
耘耔儒林植標榜自憐燮下焦亦值知音賞方當出肺  
肝晨夕趨函丈金闕佇公歸無由挽輪鞅拭目上巖廊  
獻納攄忠讜網羅寒畯姿直道光吾黨

送計敏夫赴闕

衣冠半知識喜君天下士與學滄溟深高談風雨馭  
中富經綸憂國心屢瘡誓言排閭闔開口獻天子時  
紕道不伸倦懷歸故里盤礴曾幾時九天飛詔旨春風飽



征帆一葦吳江水見晚上應嗟使華聊復爾丞相君之  
甥風流酷相似彤陛看摩肩笑談銷敵壘君家有世臣  
名實耀國史奇謀付子孫鞭笞餘馬箠行增前德光更  
雪中朝耻事成豈因人碌碌焉能比我昔綴僚末高山  
日仰止窮達兩懸殊星辰視泥滓平生白眼多君獨掛  
牙齒更須假扶搖南溟將一徙

送朱仲遠樊唐老趨闕奉大對

充城環髡山南嶺獨秀鬱何以獲佳稱上有朱鳳集三

載爭一鳴朝陽整雲翮今年二妙飛好語闕邦邑為言  
皆老蒼文采勝疇昔其一出上黨其一出沛國同聲相  
呼和深可調六律長風送天衢萬里纔一擊邕邕中簫  
韶虞廷誰可匹四顧啁啾羣俛首不能息

送張安國赴天彭司錄

騏驥服鹽車垂頭困長道蒼鷹在韝繫側耳思秋草憶  
昔初見公衮衮一傾倒平生仰止意相逢恨不早清輝  
粲景星巨浸屹孤島徐榻未易解膺門但頻掃公才天

河傾顧我乃潢潦篠簜何足云所貴會稽筭魚泳鳥雲  
飛氣合無不可歲月忽荏苒何言賦離抱彭城不百里  
摻袂空懊惱糾郡因多暇時政亦叢脞猾吏虎插翼疲  
民葉振槁邦侯待裨益幕客要標表咄嗟贊畫諾談笑  
辦紛擾江山頗足娛杯酒興不小搢筇恣清游蠟屐縱  
幽討雲煙入高躅詩句出餘巧升沉置勿問道義端可  
飽眼前多少年難致淄川老儻令班中朝功業信不少  
賤生宿所期志願慙未果因公激壯懷綠髮豈能葆還

應最課績歸步直青瑣

送友人赴省

仲冬陰氣積嚴霜凍郊坰居人猶念寒子有萬里行此  
行勿云遠去路青雲平驂騑無蹇步鴻鵠有脩翎聖明  
圖治切仄席用儒生瞳矐九門闢紛袍集王庭吾子富  
春秋詞學浩縱橫一吐經濟策唾手拾科名秋風歸故  
里錦衣為親榮昵昵重離去莫學兒女情

和宋文淵送仲明舉西歸三首

丈夫志萬里耿耿抱長慮青雲却倦飛功業何由樹廟  
堂有先達體國心焦勞歸來掩關卧茅簷日色高  
馬蹄厭長道詎忍別帝京夢想子規啼花落故園春山  
驛暗孤燈江城歇滯雨悠悠秦蜀間慨然念今古  
朔風吹別袂草色冷萋萋憑高望佳人天遠浮雲低恍  
然從之游神魂坐飛越何當清夜語分此半床月

何耕道還邛南贈詩為別

古人不復見俗學尚穿鑿時花亦可觀潢潦終易涸暮

年識吾子志與流輩各入道窮根源高情轉寥廓詩章  
富波瀾議論生鋒鏑胡為困窮途計拙客古雒出門春  
草芳西風漸搖落我時喜過從妙語資發藥人情變炎  
涼白首忽難託悵望鶴鳴雲羈懷每作惡告别何依依  
交游義不薄行矣覲親闈菽水端可樂

送齊侍者南遊

癡癡行脚師要覓南方禪不知未舉足罪過已彌天三  
千大千界當處本湛然若作如是解猶嫌墮一邊子今

腰包去慎勿求真詮真詮不可得往往成風顛芒鞋縱  
所之江山發清妍得住且即住飯了曲肱眠

贈明師

四民不相奪事業勤且專所適既多歧乃為異物遷初  
心轉錯亂故步成跼蹐一縱不可收有如解纜船而况  
佛之徒辭家童其顛耕耔兩不知蕭條香火緣胡為反  
自棄捨己芸人田筆墨殘畫永詞章奪春妍持此謁豪  
貴往往求知憐大事殊未明口張鼻撩天不見湯休輩

才名舉世傳形化心亦爾抱病歸黃泉汝質本渾金未  
逢妙手鐫好名一以誤沈溺在詩篇毫釐失千里萍梗  
空十年吾言雖屢苦掉首終弗然邇來心孔開舊學都  
棄捐青山決棲隱求師覓安禪聞之喜且疑此志諒能  
堅行矣無所贈短章當緡錢

諸公以嵩師破戒作詩嘲詠因次韻解之

老嵩悟塵緣洪爐一點雲飛行三界外宴坐常兀兀有  
如出籠鳥豈比縮頸鼈萬象一詩本章句真瑣屑世人



不識渠小智互分別豈知日用處默語無殊轍春雷未  
出地草木含凍結大聲歛然來蟄龍起脩骨神功無定  
在作止纔一瞥以詩來議師所見何纖末想當聞此言  
揮麈笑且咄惜哉二三子微漚更出沒眼翳揮未掃幻  
化何從滅月體元自空三三認盈缺長篇陋摘錦敏思  
遲擊鉢祇向語邊尋那解默時說

--	--	--	--	--	--	--	--

欽定四庫全書

雲溪集卷二

宋 郭印 撰

五言古詩

和何耕道別字韻詩

失身落宦網十載溪山別麋鹿念故棲舉目但愁絕偶  
來招提遊幽亭坐深樾美人抗高論疊疊非涉獵忽焉  
到佳處目擊了無說世患苦磨人吾肱已三折從茲數  
訪君臨流弄明月

和淵明韻贈耕道

游從無俗調我輩鍾此情高談傲義黃豈復念功名嗟  
哉夸奪子役役勞其生得失動中懷寵辱多自驚形化  
心亦爾闔棺竟無成

再和

學道無所得但忘物我情顏彭竟何在壽夭皆空名有  
酒且斟酌同心唯友生江亭縱言笑鳥來語不驚昭琴  
元未鼓誰復問虧成

和楊齊伯韻

邪師挾幻術念念皆狂圖化出一切象形容乃甚都佛  
光亦幻成非有與非無煙霞異明晦寥廓元太虛離婁  
塞其目象罔得玄珠脫能如是解安用空睢盱宇定天  
光發豈關七尺軀癡兒生謗語往往墮眉鬚乃知西方  
聖勇猛真丈夫聖人與人同此道誰不如歸來但宴坐  
反照自有餘

和樊直夫兼簡允南

士而志於道誰云不自量山海雖崇深行者尚梯航况  
復我固有本根先混茫眇然一微塵猶足鑄虞唐隨遇  
得真樂何適非道場回首觀世間汨沒誠可傷余豈不  
知耶駑馬戀豆糠春林聽鳴鳥秋壁聞啼螢是心如死  
灰妄念不復猖持此欲求交滿目都張張邇來得吾人  
宿願欣已償文字果超詣聖門早升堂視彼俗學流一  
一癡與狂所為雜霸下未可語皇王與君期戮力起廢  
鍼其育相將入山中采薇以為糧

再用前韻

少年讀書時人謂未可量及乎泛官海慄慄乘危航帆  
開風不順四望何淼茫為郎首已白安能笑馮唐緬觀  
乾坤大分明一戰場何異兩虎鬪大小終死傷所嗟在  
誅求舐米不止糠窮忙愁歎聲深秋聽蛩螢皇穹未悔  
禍尚縱兵戈猖遂令四海人冥行日俵俵得非宿世業  
今生來共償否極泰自至君臣嚴陸堂肯為阮籍醉忍  
效接輿狂似聞申甫生天遣佐宣王一展活國手疾危

救在育庶幾富斯民家家有餘糧

和于子儀觀見贈二十韻

壯歲悟修性磨礪謝圭角墮身塵網中意氣翔寥廓動  
遭白眼觀罕識黃金諾聖賢皆吾心所讀真糟粕妙處  
誰與語此道今蕭索西施及嫫母本身非美惡掩關學  
宴坐浩氣合沖漠身世鴻毛輕利名蟬翼薄兀兀寡知  
音頭童齒將豁向未得良友盃酒屢同酌見我輒傾倒  
清音聰明鐸馬隊驤天驥鷄羣昂野鶴新詩續風騷久



矣無此作詞鋒敏而銳百獻敢一酢願君偃戈矛使我  
堅城郭中虛道自來大信本不約養茲百鍊金劫火難  
銷鑠心法兩俱忘無解亦無縛參乎一以貫回也不改  
樂富貴何足云侯門空赭堊

少虛用前韻見貽仍荅二首

別君歲月多萬事皆非昔天昏慘暮雲愁緒繁堪織豈  
期成東隣日造芝蘭室吟哦戒騷奴揮灑驚墨客猶嫌  
小伎耳宴坐學欺魄人間倏流電悟此真良策堂堂少

林老我豈得其骨君來叩兩端一笑非言默超然反其  
真游子歸故宅玄機儻未領對面千山隔象罔亦何心  
珠還赤水北聖賢勿云遠警咳常在側

倦游思林泉歸夢空昔昔田無二頃良何以充耕織古  
來貴公子氣焰熏王室家饒數百僮門走三千客志滿  
繫日生坐使天奪魄我今安下僚倖進無奇策空懷愛  
主心但欠封侯骨躍金恐不祥守道甘沈默岷山高峨  
峨其下可卜宅地靈雲物秀似與塵凡隔誅茅存晚計

好在西巖北每逢風雨夜念此空反側

當可有詩索和章次韻荅之

日斜弄孤桐妙趣寄無絃暮天四垂幕溪山當華筵碧  
玉湛新醪招集飲中仙雲車夜未散短燭蟠青煙合坐  
皆豪俊風流踵前賢佳客吾豈敢追陪幸自天人材未  
易得終夜喜不眠殊特見騷雅武庫森戈鋌未能當筆  
陣敢發一矢先來意何以報慙無錦段解

次韻劉中遠見貽之什

中原殺氣昏魚鳥巢穴改城池失金湯郡邑更守宰鸞  
旗狩吳越朔騎滿淮海維蜀限山川無人識鏊鎚五年  
愧端居萬里思行在官曹敢尸素職事甘煩猥僅得容  
棲遲奚暇擇爽塏陋巷飽簞瓢隣牆挹蘭茝新詩出清  
奇高論吐雄邁談諧不知倦氣充無是餒藉君風飄颻  
祛我雲鰲黷相期樹勲名戮力熙帝載

次韻宋南伯見貽之什

哀遲來作邑勞苦劇萬狀朝朝趨衙參歛版趨踉蹌病

驥耳雙垂蘭筋困銜鞅饑鷹長附人六翮空韝上緬思  
陶彭澤解綬一何壯歸去事田園林木施幃帳隣曲喜  
過從時節爭餽餉高山與流水無日不尋訪况逢桃李  
春協氣郊原盎或携古筇行或放孤舟漾我欲追其蹤  
卜築依清曠三徑落松花四牆圍竹篴縛橋架斜川鑿  
戶延層嶂長笛月下吹逸響從風颺興來搗野老爛醉  
傾村釀便足了一生折腰寧肯强十年計未遂口腹成  
魔障蹉跎鏡中秋白髮不相放新交得山濤磊落多識

金剛經卷二  
量志趣儻能同斯文未淪喪

次莫少虛韻

富貴等勞生不如行樂耳  
遑遑觀一世榮辱隨債起  
幽尋苦無暇佳處誰屈指  
春歸呼我游邂逅佳公子  
莫侯江南秀幽香發蕙蔭  
新詩更清激瀲灩寒流駛  
錦屏有蒲郎冰壺清徹底  
便腹久空洞了不見嗔喜  
歲晚得二友追隨當行李  
五湖三江寬亦不遺洲  
汴偶來泛扁舟朱墨推案  
几徜徉一水間便欲寄殘  
齒追觀少年心寂

冥已灰死窮通豈無命流坎聽行止岷山行築室計決  
吾往矣斗酒相往還素約自今始

次蒲大受檢覆韻

身親掃除役敝袍染塵泥青雲一何高天險不可躋西  
風吹秋來草木含淒淒羈鷹屢飛掣馬空鳴嘶丈夫  
兩鬢斑籍未通金閨不如買田園荷鋤理蔬畦歲月無  
停軌歸計亦已稽年來稍聞道所學忘筌蹄

次韻彥正兄見寄

轉食祝東州安閒遂忘歸蘭齋寒燈話忽作一年違江  
流鯉魚遠但見鴻雁飛緘封一再啟字字蠅頭微書詞  
與詩意髣髴聆音微君如初生月浮雲翳其輝清光畢  
竟滿安用長噓歎勉哉辨此心正直神所依

次何耕道韻

壯歲已倦游況今老大時素交久離索勞思何可支夫  
子晚識面迥非塵中姿高言風凜凜直氣山巍巍欲登  
公卿門進退尚狐疑飄然至是邦為言某在斯相見無



別事清談白日移時時矜小技挽我賦新詩自憐憔悴  
態容德愧姜姬辱贈何以報恨無瓊琚辭

次楊拱辰韻兼簡馮可當劉韶美

窮居罕人事來往斷交親粗安鷓鴣居靡求尺蠖伸坐  
看柴門外日飛車馬塵誰能學桔槔俯仰更隨人況今  
世道喪風俗已澆淳為民非野鹿作吏無古循太倉五  
斗粟食之愧高旻故人善處我儒官飽常珍風月即儕  
侶詩書乃比鄰隤然一室中浩氣橫八垠劉郎晚相遇

放曠如逐臣素心日傾倒吟嘯樂天真  
粃糠嵇阮輩自號葛天民  
馬曹似是耳寧畏官長  
嗔墨池子揚子風流  
吾里仁偶來官一邦  
眉端喜津津抵掌論進修  
德業須競辰有時相就飲  
幕天地為茵馮君十年別  
龍鵠迹久陳邂逅果山底  
一見兩脚跋初來梅萼吐  
欲去柳眉顰平生知識多  
斯人罕其倫我今亦西矣  
筇竹訪峨岷憑誰與之俱  
足跣頭不巾劉郎歸既趣  
揚子任方新從茲遂分手  
三秋敵昏晨所期各精鍊  
加飡戒五辛他時共

相見兩頰桃花春

和元汝功元日感懷

少時喜節物常恨春來遲而令新年至懷抱不勝悲兒  
童薦椒酒未飲增長歎陝洛果何罪半世戎馬嘶坐令  
冠蓋流星散鳥擇棲回頭望鄉國淚雨秋淒淒我公關  
中豪志氣青雲齊誓當剪豺狼不復問狐狸夫何丘壑  
間從事酒與詩煙塵要一掃橐弓卧鼓鞞天下維泰山  
置器安不危廓廓大丈夫功勲千載奇

正月初八日同莫少虛蒲大受王園泛舟各賦

二首

春江晚多思拂面風稜稜舟行明鏡中天水同一澄滄  
波濯新柳喬松上寒藤風梅雪飄徑兩麥青平陵文魴  
自潛躍好鳥相喚應倥偬日少暇因循來未曾清游鄙  
謝傳豪氣壓陳登豈惟得佳士亦復同高僧幽情各披  
寫醉語或侵凌偶茲愜懷抱蕭然遺愛憎曠野暝煙合  
長林初月升回舟興未已孤塔耿踈燈

名園春信來冷眼思一窺吏文巧束縛頽脫迺不羈興  
發勇欲往壯士先登埤但得一樽樂豈論官職卑况茲  
橫清流適然副心期梅梢出翠竹照水兩猗猗野航轉  
澄碧小雨斜風吹平生江海懷是日慰渴饑村迥孤煙  
處林深幽鳥時端疑是吳越夢到身亦隨同遊客靡惡  
喜氣回朝曦醉倒不自惜一葉忌傾欹新詩許共賦未  
唱心力疲歸來已陳迹物理觀盛衰

和蒲大受王園泛舟用文老韻

邑西屋連雲中有水竹居和風縱輕楫尚憶故年初川  
光宛明媚况乘春雨餘臨波一以照颯颯鬢毛疎

江邊春色動水面縠文生陽和先着力岸柳搖金晶草  
木有欣意人心隨物情日暮不知返逍遙興彌清

古木卧偃蹇脩篁立蔥青春風眇無迹林鳥報先聲  
師任沿泝潭紋亂虛明佳人更吟詠洗我塵慮清

平生喜閒曠夢想祇山林曲江理煙艇魚鳥皆知音  
晴天亂鳬驚相呼時一沉油然淵中鱗潛伏恐不深

晚風江色佳水碧煙冥冥聊持一壺酒落日相與傾浮  
榮何預人於焉樂此生往來信扁舟恍若空中行

感春

百花感陽和次第變枯槁寒梅秀臘前紅葉媚春杪無  
端造化兒戲劇何小小迎春復送春堪笑枝間鳥我以  
虛靜觀一室乾坤悄平生誦聖言聞道亦頗早了茲色  
相空寧復問先後冥心大化俱左肘從生柳

中秋月

蕭蕭灝氣清風露秋將半  
今夕更無雲銀盤轉霄漢  
鳥語茂林驚樹影空庭亂  
常時豈不佳作意人瞻翫  
我欲上廣寒瑤瓊躡飛觀  
騎鯨諒不能永夜空慨歎  
歸來却燕坐神光自輝煥  
始知方寸間桂闕元非遠

中秋馬溪山中望月

佳月四時有古來重中秋  
今夕萬里懷共作陰霾憂  
我宿招提境山空夜更幽  
茲念亦未掃天際屢回頭  
冰輪湧碧空宇宙寒飈飈  
清輝聊一吸洗盡肝膽愁  
山中魑



魅窟驚竄無所投自言天眼明此地非我留緬思區域  
內醜怪繁匹儔不知大圓影能盡驅除不仰首祝天公  
勿遣纖雲浮縱此白玉盤年年照九州

中秋月試院中作呈莫少虛

月色本無別殊觀空世情今宵雲四卷冰蟾照寰瀛無  
端坐文闈兀若翳雙睛窺牖偶一見始驗陰陽并孤光  
何自來遡日以為明三五魄既絕輪郭自充盈循環到  
今夕逢金氣轉清乃知造物意微妙不可名伊余稟賦

初二曜同流行呼吸即寒暑乾坤屹崢嶸隋珠彈高鳥  
惜哉輕此生恨無騰化術返老成童嬰要須驗羲易觀  
象研其精聖處儻心悟超然合混成

次韻莫少虛中秋月

纖阿駕秋空雲散無一髮長廊步清影露頂脚不韞緬  
懷同心人尺咫限胡越豈殊南郭老連牆不通謁我憂  
今夕去難得如此月佇立耿不寐精誠通恍惚莫兄新  
詩來夜光映深樾頗驚筆力壯滔滔漲溟渤喜極屢索

酒引滿非人罰醉歌還起舞恍若換凡骨何當乘飛雲  
舉手探蟾窟一吸徑寸光盡解平生渴飄飄曳霞裾出  
入黃金闕陋哉揖爽氣空拄西山笏

再用前韻

我生垂四十兩鬢抽素髮聲色不掛眼豈羨凌波艤唯  
有學道心了不見超越何由插羽翰往造金門謁反觀  
金水性端似天邊月本從無中來一物肇恍惚玉兔吐  
寒光琪樹遙清樾亭亭照八紘圓影射滄渤斯言世豈

聞輕泄恐天罰吁嗟夸毗子自分無仙骨狗財析秋毫  
嗜酒醉深窟一迷不復返長病如中暈空存玄牝門金  
樞已摧闕猶為兒女計白首戀簪笏

少虛以中秋有月預作詩亦次韻矣而月不為  
出因成數語以解前篇

茲辰陰雨霽佳月望雲端徹燈不掩戶佇對清輝寒婦  
娥豈誤人出入由天關天應怕鑄鏡故將好景慳坐久  
成歎息邂逅一何艱收視照肝肺中有白玉盤光明無

與比通昔夢魂安君今先悟此一笑定忘言雖云形影  
隔是心常往還前詩非游戲勿作綺語觀

再用前韻以謝諸公見答之什

三賢富文詞獻笑發其端瓦礫換瓊瑤光照窗几寒熒  
煌句中眼真透祖師關孺子或可教傾倒無用慳嗟余  
腹空虛思苦言亦艱豈如新詩章字字珠走槃同門法  
禁嚴欲往心未安跬步乃千里髣髴聞笑言憑誰寫曾  
臆錦囊去復還步海吾豈憚波瀾時一觀

九日詩

去年今日好在家作重陽佳菊嗅金盞濁酒簪瓊漿婦  
子相提携江臯步晚涼頗思一遠眺平原欠崇岡今年  
九日惡踈踈走路傍即無新釀白豈有半開黃老婦與  
弱子千里遙相望登臨眼雖飽四顧斷人腸自憐如浮  
雲天風久飄揚世間功名夢一枕猶未償而此蒲柳年  
餬口落四方五斗計何拙饑烏謀稻粱况復事塵土險  
艱皆備嘗家有二頃田可耕亦可桑賦租願少醵翩然

歸故鄉

九日同諸友游豐樂院翠園亭檻前竹樹蓊蔽  
命僧剪除青山宛然復出遂以開林出遠山為  
題探韻印得林字

築亭邀青山眷此幽意深十年廢掃除木拱竹成林客  
來眼生翳不惜斤斧尋丁丁度餘響几席延嶽峯一掌  
開平川雙鬟出高岑初疑白日晦坐頃失繁陰虛壁蕩  
晴影耿耿明衣襟是時菊花節悠然副登臨殘霞映夕

金八卷二  
酌幽籟隨清吟人情異晨夕山色無古今世間諸法空  
通塞本由心勉揮金寶劍勿使茅葦侵

九月二十日率趙彥和王平叔劉誼夫遊棲巖  
寺彥和有詩次其韻

少時苦愛山藜杖春復秋峯巒如佳人一顧銷百憂野  
性不受羈思與麋鹿遊失脚名宦場冠纓絡人頭州家  
費經營心輪日萬周遇陰求少息此身等蜉蝣頗聞西  
山佳往作半日留小徑開宇宙髣髴規神州萬象几席



間雲煙渺沉浮同來三益友清逸詩家流相期老巖穴  
委質巢與由吾廬有雲溪拂袂行歸休

--	--	--	--	--	--	--	--

欽定四庫全書

雲溪集卷三

宋 郭印 撰

五言古詩

朝日

雞號出郊垌殘月猶未沒東方迤邐明林表上初日團  
圓狀車蓋光射半天赤我時決兩臂喜極還歎息邇來  
天令乖宇宙秋霖積陰霾翳扶桑不放翔陽逸行者厭  
泥塗耕者憂稼穡官卑何所為坐眎空戚戚金烏忽飛

曉光曜宛如昔湏臾一鏡昇煙霧眇無迹八紘頓清明  
萬象趨烜赫人情絕愁歎熙熙遍阡陌無端南山雲尚  
恐復蒸鬱安得大力士長挽羲和出

晚晴

朝來寒露重旭日慶新晴長空煙靄淨遙岑錦繡明野  
競農夫穫路多游子行歲事竟如何且欲供粢盛矧彼  
關外戍仰哺十萬兵糧運僅不絕因緣活此生吾家有  
瘠田努力事躬耕寧辭畎畝勞每作風雨驚心期了租

賦敢望倉箱盈耄齡無多日妄意觀太平

馮當可以日暮碧雲合佳人殊未來效建除體  
作詩招勝之且索同賦因用其韻

日色久無光霖霖更彌旬暮空出華月秋氣生精神碧  
天湛如水山川供奇珍雲韶髣髴奏噤噤鴻鴈賓合歡  
亦有酒寫景招四隣佳篇一諷誦逸氣凌蒼旻人龍憶  
許子枉駕定何辰殊方思會面語笑情益親未聞環珮  
音懷想空谷人來成六溪逸氣合同天倫

恭南酷熱

陰陽有定數天地無全功偏雨或偏暘消息豈難窮今  
夏孟仲雨季月暑隆隆赫曦不停軌火雲日燔空晨興  
迨晚暮危坐沸鼎中一夕四五起倦鳥思逃籠扇手腕幾  
脫所招皆溫風年來復何罪遭此爐炭烘迅雷空殷殷  
微雨祗濛濛焦然到草木禾稻憂不豐頗聞炎瘴地威  
勢增祝融又聞大熱獄食飲渾洋銅法法惟心造報應  
萬不同吾家有雲溪竹間二水通入門爽毛骨清絕廣

寒宮插羽欲飛去免為旱魃攻

和元汝功晚涼城上

潛鱗思縱壑倦羽欲歸林平生山水興過眼必登臨  
况復西風來天雲布層陰殘暑退十舍新涼直萬金  
寒光流素魄遠碧露危岑高士感時節忘言發幽琴  
子期不可作天地知吾心林木為之振人間無此音  
詩成寄孤客清飈一披襟會當逢好景藜杖去相尋

久雨

乾坤冷氣積無日不陰雨泱泱晝連宵簷聲暗砧杵田  
間愁老農道上泣行旅首尾四周旬泥深汚后土有時  
暫止息無奈雲仍聚晴陽出復沒明滅見林莽萬事姑  
置之所傷在秋稌何歲無凶荒中原尚豺虎軍食竟不  
充饋餉尤艱苦稽首望羲和披陰照寰宇

亦樂堂

君子素位行窮通等寒暑漠然隨所寄廊廟即環堵姬  
孔彼何人名德照今古若以優劣觀此論吾不與鄙夫



晚聞道行藏心自許白髮尚婆娑青衫久藍縷雞鳴意在晨寧復問風雨樂天夫何憂貴賤同歸土

自堂詩為張億作

大道絕羣倫古今無匹配張子涉其源超然意冥會宴坐一堂空乾坤皆破碎八荒自神遊萬法非我對眼前鬱崢嶸毫髮了無礙揭名諒真實舉首誰領解吐哉愚癡兒矜已妄尊大一念思遺物胷次先憤憤不見南榮趣偕來還幾輩顛倒欲何之却走山愈背吾今識子蔡

獨立形骸外寂寥千載餘光采炯如在

李文山書堂

蓄書不能讀人以書簾方譬如守錢奴萬鏹空靳藏讀  
書不能行虎皮質犬羊詩禮假發冢高言誣黃唐我觀  
古聖賢道學甘膏梁文字初未廣游心自得場後人富  
典籍洛誦日洋洋唇腐無所歸白首徒悲傷普慈羣圃  
勝中間敞華堂本非挾冊地賓筵羅豆觴揭名意安在  
詩板借輝光斲輪如可作試與一平章

橫翠堂成與諸公落之蒙貺佳篇不敢當也謾作  
數語以紀其實

何處無奇觀隱顯隨所遇事有幸不幸邂逅元非素招  
提枕山趾出郭纔數步高亭齊浮雲杖策邀我屢西廂  
偶徘徊屋敞驚顏仆穴壁試一窺似覺萬景聚同來老  
先生錯愕喜相顧明朝便鳩工棟宇更尋度華堂不日  
成雜沓千山赴落日下層巔寒烟籠遠樹乾坤發祕藏  
物象爭呈露爛賞良未能草略杯盤具羣公意盡歡韻

語各吟賦和氣回陽春篇篇奏韶濩堂以橫翠名誇詫  
盈道路人材何異此用舍得其趣渭濱一釣夫起為周  
室輔皇皇魯真儒終以不合去聖道奚加損山亦無新  
故廢興適然耳萬事成感悟

草堂

草堂何處覓雲黯浣花溪棟宇已非昨松竹尚依依荒  
坡卧頽日寒浪搖清颼萬象不禁寫吟哦想當時我公  
本天人造化生肝脾道大世不容遠跡西南維波濤湧

筆端孤憤寄新詩詩中盡經濟秋毫未設施後人不知  
公但賞瓊琚詞文章一小技于道信為卑

山齋

我本丘壑姿脫巾為謀食隨牒幾推遷銅章領巖邑初  
期竊餘閒焚香弄書冊文法何苦多日力不暇給訟紙  
秋葉翻使符星火急自憐拙追科難復濟繁劇秋毫殊  
未試直道聊收拭白眼已紛紛丹心猶汲汲要令四萬  
家實惠消塵及怒罵奚足云此意天應識西齋靚且深

於焉少游息幽獨誰相對古壁蒼崖立高人喜過從玄  
論揮八極世情一笑休欲語不如默

仁壽縣治新開小軒以琴中趣名之用趣字韻  
賦之

淵明識琴心徽絃總不具興發時撫弄悠然得真趣杳  
然太古音充滿一切處吾今琴亦亡至樂隨所寓調此  
方寸微物物盡和豫一奏萬化熙再奏九功叙大聲越  
宮商俗耳恐難喻單父不下堂陽春被黎庶

次韻蒲大受琴中趣二首

二器入範圍物物皆吾琴外響蘊真寂中虛含妙音世  
人若著相正墮聲色林那知反聽處萬象融一心伊余  
晚聞道奇病得聾瘖詩成自吟詠酒熱誰獻斟山高水  
洋洋子期亦已沉燕坐忽神遊月明秋夜深

人生飲天和各抱無絃琴云何不自開溺彼宮商音鄭  
衛劇淫哇聽者返如林耳根一以蕩萬劫迷真心安得  
佛之力與世開羣瘡神機運帝車元氣如酌斟魚鳥得

其性雲淵自飛沉不見南風歌仁聲入人深

新開小軒晁子西有詩以韻答之二首

平生棲息地往往旋修築為憐雙淨眼不肯受羈束  
官居鑿小軒容膝蓋已足於焉得逍遙內視聊自牧廓  
廓乾坤大冥冥鬼神服是心不違仁如種五穀熟乃知窮  
且賤未必不為福朋僚餉新詩句法驚小陸秀色增雲  
山榮光發林木何妨曳杖來斯樂未敢獨清談可以飽  
豈但蠲煩促非必酒與肴佳客始能速



我無先世英敢望燕臺築譬如坎井蛙拘虛徒窘束又  
如鷦鷯巢所寄一枝足名不聞公卿迹非侶樵牧眼花  
鬢毛霜黽勉作侯服吏才固不高民事亦稍熟每欲思  
寡過豈敢求多福羣公遲風雲行矣龍起陸佳篇雜沓  
來文繡被土木坐令北窗下不知有窮獨相逢一笑粲  
語妙席自促憑誰覓仙方造酒後巡速

題蘇慶嗣睡樂軒

六鑿森劍戟一枕寄華胥覺夢既殊轍睡兮真樂歟達

人蘊大觀方寸包太虛憂樂兩不知寤寐常如如昔也  
蝶栩栩今焉周遽遽而於我法中無欠亦無餘以睡為  
樂耶不睡寧悲渠然則此軒名無乃滯一隅蘇子笑而  
應斯豈真吾居飄流閱世故早識心地初今古一偃仰  
天地一遽廬揭名聊爾耳至言恐驚愚

楊隱父新開竹軒賦詩遺之

擢榦傍東岡窮年閔幽獨寒分渭水烟瑩矗藍田玉鑿  
戶清飈來秀色鮮可掬羈人初二見洗盡塵土目中心

已空洞勁節秋仍綠相期老歲寒榮悴從草木堅姿恐  
為用扶危度深谷化龍生雲雨豈止鸞鳳宿

隱父見示和章再用前韻

關西千戶侯分此霜根獨幾年用幽意列屋攢蒼玉如  
聞手自種培養非一掬高標邈何所於焉識面目臉笑  
桃花紅眉憎楊柳綠頽然立兒孫挺操異羣木我嘗聽  
餘音球琳響山谷當約嵇中散攜琴此間宿

再和前韻答隱父二首

吾宗枝幹衰弱植念孤獨結交得此君蕪葭倚瓊玉即  
之不忍去爽氣如可掬初觀愛柯莖久坐窮節目細葉  
裁雲新深根封蘚綠從今淨兩眼不數山中木世路繁  
荆榛相將隱空谷直須丹鳳來采實虞庭宿

植物稟清氣天與寒筠獨陸離草樹間貴賤分珉玉王  
孫愛天紅采藥動盈掬如何檀欒姿睥睨少青目物色  
變炎涼永守霜中綠豈無噦噦音律呂諧金木世無伶  
倫耳風雲駐幽谷七賢何苦來契約元有宿

知郡范公澤游野意軒盡斬軒前惡竹之蔽眼  
界豁然時升有詩用其韻

勝景天壤間造物不能祕堂堂亘古今取舍愈無匱江  
山本自如優劣隨人意城東古招提軒宇舊鑿翠老僧  
不解事養竹日蒙蔽高人偶來游躊躇重增喟呼童縱  
斧斤似割眼中翳平原露寒蕪遠樹浮翠氣天闊飛鳥  
沒雲烟蕩無際快哉指顧間千里歸睥睨我聞亟走觀  
宛非前日地風光捆載歸髣髴挑吟思珠璣忽飛來恍

與吾心契更欲紀其由多辭亦云贅

題宋公主宿雲軒

趨名老鞍馬避世終山林二塗各有蔽賢哲多所箴宋  
侯初出仕逸足已駸駸世路厭荊棘翩然脫華簪卷舒  
何自由白雲本無心開軒資笑傲霜筠綠陰森牀頭有  
濁醪壁間餘素琴淵明久寂寞千載得知音

題絕塵亭

咫尺有佳境何用山澤游地偏塵自遠松竹鎖深幽亭

亭出危塔湛湛俯長流憑軒目一縱驕蹇萬象收我來  
意頗適坐對孤雲浮同心二三友曠達亦罕儔銜盃送  
頽日隨寓得所休不知世間人亦有此樂不出處付身  
外吾生可自由他時儻乘興相伴只沙鷗

與大受述之耕道游絕塵亭探韻得賦字

人生合散多罕與故人遇今辰天氣佳偶爾得清晤况  
復臨江亭一目萬景聚晚煙乍明滅天遠重重樹長江  
灣環來浩蕩仍東注對此酌春酒飲酣詩可賦我欲寫

筆端恨無摩詰句豈如二三公才力超七步觀情殊未  
闌倏忽天欲暮憑誰挽羲和為把車輪駐

和光亭

竹裏徜徉了花開也一過桃杏東風淺海棠春意多華  
麗豈不好達人要同和青青與紅紅相去能幾何況茲  
十二法淨穢本同科而彼世間愚妄想分白窠我昔早  
聞道隨流挹其波照鏡覩功業素髮從蹉跎林下既逍  
遙塵中亦婆婆不妨喚天女來伴老維摩



乘桴亭

孔子道不行時君目腐儒亂邦難置足遂欲九夷居更  
作乘桴語與此意何殊一木異舟楫波濤寧可踰憤世  
有激爾蓋用警聾愚季路猶未達而況他人與我生亦  
不辰兵戈溷中區兩脚倦遠涉跼蹐西南隅臨深每慨  
嘆長江良起予興發撐小艇鬱堙聊一舒

倚樓

官閒何所之倚樓縱遠目田疇耒耜出高下春雨足人


家有生意慰我苦幽獨憶昨水沴餘海氣蕩坤軸蛟龍  
坼川原舟楫造谿谷禾麻安更論未能保骨肉有子易  
為食何以厚風俗上賴天子聖詔書勤撫育雖使發倉  
廩飽歲實無蓄郡縣徒倉皇論丁具饘粥所救無幾何  
往往委溝瀆今茲氣候正逋民稍來復楚風重祠廟纔  
歸競巫祝此物豈有靈焉能助豐熟渺思濟時策慎擇  
良宰牧金縢斥誅求教化行比屋祖宗德澤深萬歲長  
沐浴題詩起高興飄然跨鴻鵠

登致爽閣觀山用種字韻同賦一首

羣峰鬱崔嵬西北天壁竦短松被南岡髮立何種種中  
間一川平秋枰界千隴晨光霽霧濛冥色寒烟重幽人  
每登臨氣與秋山聳萬象入嘲弄敏思飛泉湧嗟予老  
索寞高躅難繼踵風光本自如綺語浪嘉寵况復將此  
心勃勃塵慮壅日月不假借學道須猛勇誓當守株愚  
從人呼倂癯

戲題睡庵壁

自我觀世間色色厭逐迫箇中無尺地漫不見阡陌中  
有南柯游未怕東方白閉眼一榻多開眼六合窄彌明  
息如雷非我門下客覺寐兩不知偃仰有真宅



欽定四庫全書

集部

雲溪集卷四至六

詳校官左中允<sub>臣</sub>璫五珠

主事<sub>臣</sub>呂雲棟覆勘

騰錄監生<sub>臣</sub>汪麟

騰錄監生<sub>臣</sub>尹大謙

欽定四庫全書

雲溪集卷四

宋 郭印 撰

五言古詩

遊大隋山

我聞大隋名夢寐猶記錄得檄天彭道喜氣和可掬出  
城六十里崎嶇轉江曲山門忽斗上危步依筇竹崩石  
帶烟雲異草羅澗谷寂鳥下窺人羃猿時挂木路窮纔  
見寺金碧煥雙目祖師古定光燈冷無人續開公生異

世大事如付囑僧言山長陰朝暮雲容戲茲辰為我晴  
疊岫堆濃綠虛閣倚秋風一洗塵土俗舉手揖丹景損  
身跨白鹿十年勞問訊親到心始足坐久燭漸微借榻  
雲間宿山寒寐不成窗外泉鳴玉

全蜀藝文志 案此一首係宋詩紀事所

載今採  
錄補入

### 題李彥澤紫雲洞

老李天中仙一念人間世簪裳四十秋不取公卿位星  
斗爛文章日月懸忠義緣斷還帝鄉飄飄若蟬蛻玉骨

瘞高丘乃其所卜地山川暨草木拱揖浮蒼翠向來峰  
之巔勃鬱蟠紫氣神物常護持景色多秀異郎君久慕  
道泥滓唾聲利石洞琢青苔萬古開天秘非闕痼烟霞  
稍欲遠朝市要棲老仙靈以奉香火事不知騎鯨去塵  
宇寧俯視洞兮既清幽且盡人子志

龍淵

脩竹不知數雲藏小渭川亭沼經營初觀者日駢闐者  
舊為我語中有一龍淵時時見怪象吐氣如長烟漁人



或艤舟樵牧不敢前茲實總角時耳聆父老言相攜示  
其處止水涵青黥沈沈不見底似有蛟蛇蟠我時心語  
口龍豈居其間江湖非不廣而此棲蜿蜒有無未可知  
疑信空相傳皇天儻困汝時至須騰騫滄溟可以家一  
徙窟宅慳變化作霖雨滌蕩驕陽愆

和元汝功江臯感懷

奸諛同一轍舉世誰與歸溪山有佳趣此樂知者稀悠  
然遠冒弋魚潛鳥高飛不作無根雲蒼狗變白衣使君

見幾早萬事已覺非拏舟漾清波策杖登高崎遙興  
未已烟霞收夕霏身從麋鹿遊心與塵垢違惜哉經綸  
手把釣渭水湄冷眼笑紛紛甘貽肉食譏強敵猶張王  
屠滅煩天威要取虞淵日咸池浴明暉願君投緡竿風  
雲起苔磯雍容坐帷幄密勿旋樞機莫學西山卧窮年  
空采薇

泛舟至臨江院

清江借篙師津流不須問行行鏡中天水鳥嗔人近絕

岸得危亭一目千里盡山川草木妍造物無少吝誰知  
天壤間眇然一方寸

十一月四日陪諸公游神泉南山院二十韻

官閒訪招提偶作南山遊門前喬木陰蒼藤掛髯虬野  
僧出迎我貌古氣且柔相將入壺中水竹淨雙眸萬竿  
團脩翠一溪皴橫流長橋翼方沼髣髴疑行舟角門通  
細路崎嶇上層丘樹色老欲暝風聲寒自颼佛閣瞰澄  
碧下有百丈湫客言龍所邑不受魚與鱖行行更小亭

羅坐得小休石罇流清泉甘冷無與儔濯足夫豈敢洗  
耳良末由自憐山中人十載冠壓頭公檄聽奔走端似  
置書郵惟有烟霞疾沈綿未肯瘳邂逅愜幽懷落日尚  
遲留五斗奚堪戀十畝亦易求要希陶淵明投綬事農  
疇超然傲塵世知命復何憂

遊楊村仁王院二十韻

山行不作懶杖策窮幽邃崎嶇十里餘乃得桃源地竹  
樹翁以鮮峯巒秀而媚嬌雲弄奇姿啼鳥含幽意周遭

惟幄中一帶江流駛始知造物慳異境亦所秘行行松  
門深鐘磬出蕭寺殘僧五六輩相顧各猜異須臾問訊  
通顏色頗夷粹高堂清風多起我無窮思提攜更小庵  
清絕非人世自憐學宦游十載沉卑位功名與丘壑兩  
計皆未遂時變攪中腸憂端叢千蝟豈如山間僧了無  
秋毫累一榻寄巖阿烟霞為活計脫身名利塵洗耳市  
朝事茲遊成邂逅頗與宿心契晚日下層巔躊躇聊自  
慰重來定何時往往先夢寐

普慈郡池板橋頽壞更為石橋

蓮塘十畝方中作長橋渡荒荒歲月老烈烈風雨蠹板  
面折已穿梁脊橈而腐我來日曳杖往往不能步平生  
歷險危所至靡驚懼唯持忠信行似有神物護但憂強  
童子失足或顛仆乃伐南山石甃成如砥路曾微十日  
勞遂享百年固悵昔用材力其費一何巨前人豈不思  
襲舊終莽鹵作詩示兒曹萬事長要慮

放步園林得俗字韻

林稀怨秋風松柏未改綠偷閒挈杖來小逕緣詰曲鳥  
鳴契深心山色供遐矚欣然若有獲一蕩塵襟俗平生  
本逸放誰信簡書束失身名宦場冠冕成桎梏老驥欲  
何之鹽車終局促求仁又焉貪知足乃不辱納納乾坤  
大胡為自躅跼歸歟倘成賦矯首雲中鵠

次韻仲明舉西郊別墅

我聞脩竹陰清邃不受暑安得十畝餘其中創幽墅日  
長惟鳥聲晝靜無人語習習來微風蕭蕭墮寒雨呼兒

出柴扉垂綸坐沙渚斯志久未遂世路今彌阻新詩何  
起予風味勝清醕自憐拘一官隱逸愧前古好夢只林  
泉羈蹤猶糞土豈能學貪夫忘身徇主組

前十三章未見營創之意因成古風

紛紛世間法失得隨所寓有心不吾來無以不吾拒敝  
帚貴千金窮閭封萬戶成理先默定疇能測其故我生  
麋鹿姿林壑所忻慕抗志老淵明早卜柴桑住蓬門直  
清江傍有萬竹塢捐金買尋丈地主牢不許往來二十



秋垂涎焦肺腑誰歟誘其衷百畝修見予雲棲眇空明  
似有神物護入林兩腋風步武覺輕舉三徑手自開一  
一通幽處取勝著新亭揭名非苟取遐光遠山入靜聽  
珍禽語園花四時春岸木千年古昔也荆榛場今焉瓊  
王府清境世所無金谷誰比數再拜天之賜從茲謝簪  
組名宦空疲人視此真糞土

治園

故園別日久歸來三徑荒叢竹壞新壁枯荷掩幽塘滿

地葉狼籍草木為不芳兒童力併除百卉儼成行遙岑  
出蔥菁清波皺滄浪一朝舊觀還林壑愈爭光

掃徑

陰森百畝林所向無不好俗客豈曾來幽處通蓬島一  
色盡琅玕堅潤真可寶天風時脫葉滿徑堆殘槁適然  
賓客至課奴先痛掃要使吾心淨置之勿復道

留客

田廬欠過從每與樵漁伍胷中抱鬱鬱舌在不能吐佳

客忽顧我苦留終日語林間喜徜徉縱舌評今古所具  
只村醪水竹當籩俎臨去約重來一笑便相許

負暄

儒生習氣深寒陋渾未除茅簷負晨曦暖入四體舒怡  
然得真趣自謂世所無不知華屋下繡茵圍紅爐風霜  
攪乾坤凍死盈路隅無計凌空去雲間留日車

臨流

長江一鏡淨豈但燭鬚看清光瑩我心雙鬢任如絲鷗

鷺近人來游魚亦可窺不把塵纓濯身世兩相遺好觀  
東去浪晝夜無休時學道正如此到海以為期

閒中真樂

人間富與貴孰不羨王侯靜邊細一觀何其勞且憂去  
來風中雲出沒水上漚推遷無定在秋毫非我謀既仕  
知此理官衙屢回頭今也衡門下卧起得自由隨流任  
縱橫飄如不繫舟觸處盡禪悅俗樂寧可侔死生夜旦  
耳吾心有天遊肯學癡狂子蓋棺事始休

閒中打睡

永日無一事何妨白晝眠是有佳處心形每自便六  
用不能行根塵都棄捐非醉亦非迷神守得安全古人  
曷訶責蓋欲繩其愆糞牆斥宰予便腹嘲孝先我則異  
於是一息養綿綿魂夢既已無中局絕萬緣不游華胥  
國真樂侔乎天要學希夷子且作地行仙

夜坐

永夜不可寐霜風悽北窗一室何所有書帙對寒缸當

今苦乏才九鼎從敵扛翠華塵屢蒙南北分大江有酒  
強排遣飲濕難空缸孫臏不再生疇能死窮龐肉食無  
遠謀孤裘正茸尾我欲叩閭闔鐘以寸筵撞理亂非吾  
事憂心如是降宴坐鳴天鼓和聲聽逢逢

感懷

冬仲陰氣驕微陽尚潛伏草木慘無容霜威日夜酷君  
子覽時運悠然守幽獨吹律者何人微暖還燕谷玉衡  
無淹次天道旋反復低回佇春風求友升喬木

又用前韻

道人息以踵氣馬自調伏神爐造化馳不畏寒暑酷雖  
同一世塵超然立於獨飛泉上崑山赫日升暘谷我今  
涉津涯宴坐成休復不材終天年庶比山中木

次韻宋南伯感懷三首

青山含遠意白雲弄奇姿喚客早歸來一洗塵土衣巖  
壑定誰伍泉清竹漪漪危邦固難入賢哲多遯肥

酒盞解忘憂茶甌工破睡酒酣無何鄉睡起人間世但

看了了時孰與陶陶醉千古杜康功麴蘖因君置  
衰年今五十兩鬢雪霜明出處負前輩折腰若為情日  
月鳥飛翔燕歸鴻復征是身已虛幻敢希身後名

再用南伯韻

乾坤誰整頓世乏英雄姿陛下求賢切焦勞見宵衣草  
茅豈無人耕雨釣寒漪如何一終星坐視戎馬肥  
紛紛愚癡兒開眼却如睡況於世法中而能了出世接  
輿本非狂阮籍未為醉知命百無憂餘生任廢置



同僚多絕識，罔罔秋月明。遨遊但詩酒，頗慰薄宦情。否極泰將來，天衢看彙征。顧我老無用，敢附青雲名。

再和

玄真仙中人，蕭散自天姿。放情烟波裏，不肯汙朝衣。一葦載明月，寒光動碧漪。何以羞晨餐，春江鰕魚肥。

我愛希夷子，妙處渾一睡。無心樹勲業，栩栩同汙世。夢裏還獨醒，却笑羣兒醉。時事嗔人說，達官從措置。

由來世間事，黑白忌太明。稍欲辨淄澠，開口咈衆情。青

山有歸路杖屨借遐征寄語社中友休苦釣時名

病起贈劉元圭

學道淹四紀微疴一點無今年歲八十有疾纏吾軀初  
因水道澀藥寒變河魚食飲便退縮脾土成中虛言語  
氣自短坐起人須扶四肢時厥冷甘心委冥途醫者紛  
紛來其說庸且疎萬方覓靈丹千載憶神盧紫巖老劉  
君深通黃帝書易學自該貫醫術乃緒餘一診洞腑臟  
再診知榮枯謂當十耨壽小恙安足虞藥石未數進疾

證半已除乃知所造妙當與古人俱自足著方論欲以  
開迷徒新書若行世功倍南陽朱吾聞活人多天報定  
不渝施此安樂法勝造千浮屠陰德在一念豈止治獄  
歟況君有令子歸矣高其閭

病目

開眼萬象生闔眼萬象滅生滅本無體人心妄分別我  
初病眸子散漫空花發視物都矇矇浮雲翳秋月謁告  
旋掩關十日人事絕密室宴坐餘神光潛洞達俄於冥

冥中瞭然得朗徹以茲悟色性六根成解脫緬思濁世人  
逐見互攘奪外為物所障兩眼暗添屑豈知有良醫  
利重金篋刮作詩示盲俗聽此還丹訣

問養生於曾端伯

平生慕道心荏苒歲月永  
尠福未逢人桑榆驚短景  
使君蓬萊仙天遣下塵境  
訟簡刑獄清吏退文書省  
詩鋒禿千毫量陂吞萬頃  
縱言及養生大抵宗虛靜  
逍遙思慮空恬淡聲色屏  
火透尾閭關泉落崑崙頂  
龍虎閒名

字安用分爐鼎衰邁偶遭逢踴躍真自幸願許燕閒餘  
握衣竊有請半語為發藥醉夢一呼醒庶幾垂盡年獲  
與天地並

謝曾帥養生訣

人生不盈仞中有天地機哀哉蠢蠢羣沉湎無所知六  
根亂塵境一念落邪思遂令至真宅棟宇日頽隳先生  
早悟此寂照通幽微真火下騰焰靈泉上生肥巧妙神  
明出功深造化馳每憐好道人羅縷為指迷鄙夫尋訪

久膚淺得其皮向來發關鍵一掃雜學卑五行識顛倒  
八卦知推移兔從月窟隱魚向天池飛躍躍心自喜扶  
老得吾師何以報恩德晝夜勤行之



欽定四庫全書

雲溪集卷五

宋 郭印 撰

五言古詩

閒中讀易

聖人闡性命易書所自作要令末世士悟取先天學俗  
儒何紛紛私意妄穿鑿或被陰陽拘或遭象數縛執一  
以為真盲夫妄捫摸我嘗皆過眼去道轉遼邈粵從探  
釋氏與處窺其略返照日月久豁然生妙覺八卦未畫



初玄門啓關鑰向來百家言盡把束高閣

閒看佛書

金仙入漢夢始聞佛法東梁武好尤篤上下爭尊崇尋  
譯到李唐伽藍棟宇充煌煌五千卷披讀未易終楞嚴  
明根塵金剛了色空圓覺祛禪病維摩現神通四書皆  
等教真可發愚蒙我常日寓目清晨課其功油然而心  
處喜樂浩無窮寄語看經人勿墮文字中

讀維摩經

白衣心出家從古推淨名無疾現有疾特地真機生佛  
欲遣人問指示轉分明宜是諸大士辭屈不能行文殊  
末後往萬衆心已傾箭鋒相注處妙義益崢嶸芥子容  
須彌毛孔受四溟此理自灼然學者疑且驚更談不二  
門法法俱見成一默豈無語其聲如震霆

讀金剛經

智慧比金剛能碎諸煩惱良哉須菩提為衆非草草再  
三立問端一起復一倒要以撼瞿曇俾之攄懷抱瞿曇

了不惜意切如老嫗始終談四相畢竟盡除掃為言福德性勝施千萬寶因果本來空種種惟心造默觀契予意披味恨不早已喜識真吾何妨行六道

讀楞嚴經

學道證聲聞習氣猶未斷百生恩愛情會遇終惱亂阿難佛寵弟亦遭淫女難神咒攝來歸宿業堅冰泮快演涅槃門反復徵所見文殊更說偈明指圓通岸其餘肆口言心真自一貫三界七趣中有相無非幻最後大慈

悲力破邪女叛天魔與外道從此悉銷散

讀圓覺經

萬法歸一心一心何所寄靈光自巍巍無物不具備如  
來既先覺要警衆生寐倒說縱橫說莫非明此事上根  
可與語惟有十二士問略答更詳玄關大開示下及三  
種觀真修豈容廢定輪各差殊均入清淨地直須頓悟  
入不落第二義圓覺與圓通總是閒名字

治平院三蘇像

三蘇皆天人著作浩篇簡少讀鬢成絲苦恨生何晚人

言筦庫卑我自得疎散春風牽衣裾興發無近遠禪堂

儼真容光炯破昏眼父子也而處

葉父子也而處句疑有誤

天界岷

峨產揚馬爭軌躅孔孟發關鍵日月有盡時斯文未埋

鏹邪說入人深風俗頽莫返招得戎馬來中原恣蹂踐

緬思藥石言禍患已先見安得起其靈一副蒼生願

提宮宇文朝議輓辭

能可

憶昔我弱冠辟廂尾羣英公時少二歲籍注國子生同

舍氣味同異姓而弟兄厥後公筮仕我亦獵科名參辰  
不相比邈焉笑語并雲溪既卜築來往數逢迎玄譚入  
理窟淡交遺世情邑人敬二老可為來者程頃年我出  
使公言勉一行僂指解轡歸請當踵前盟山頽梁木壞  
聞訃恍以驚迹公生平事表裏皆純誠居家簡以肅從  
官廉而平應酬心地虛不見喜愠萌處順悠然去了無  
絲髮驚迺知學道力堅剛老益明天報良未已諸孫何  
錚錚回首丹旌路風悲涕淚橫

輓朝請大夫致仕李公詞

諱仲侯字君直左綿人其子廉夫以書來

求

聖賢志於道朝聞而夕死回視名宦場唾去如泥滓高  
風既寂寥士俗皆靡靡倒行日云暮漏盡不知止遂令  
搢紳談進退為難事二疏及淵明千載幾人爾公生富  
貴中習熟在紈綺胡為總角時嗜好異羣子愛親自天  
性弗忍離步跬治官即理家所至功可紀夫何不待年  
棄紱休田里定應早聞道追跡前賢軌盃深別墅春舟

漾清江水圍碁或賦詩此樂真無比優游二十秋所得  
益多矣臨終更琅琅視身如脫屣洪範五福兼於公未  
為美誌銘乃實錄便可當青史

宋元繪輓詞

國家有禍源王氏變新法元祐壅其流舊防無敢越逮  
至崇寧初陰霾蔽日月潰彼千仞堤橫波不可遏求言  
姦臣計正欲穿豪傑君時亦抗章痛哭深論列禁錮二  
十秋著書憂愈切緬觀前日事一一符君說朝廷思大



用銅虎初旌別使者復何心吹毛聽媒孽皇天不憖遺  
山梁遽摧折七十五年間飛電纔一瞥殘編溢巾箱光  
焰星斗揭後人何首首端不墜風烈

史德修輓詞

世道交相喪古風邈悠悠真純化浮偽士俗日以偷公  
生寂寥後慨然跋前修奧學窮根柢高文謝雕鏤壯歲  
拾科目回翔四十秋孝弟可移官所至人歌謳處已務  
恬退馳騫吾所羞臨民本慈惠擊搏吾所咻俯仰無愧

忤言行何悔尤邦符與使節異乎人之求可憐貪殘子  
快意之遠謀報應捷影響坐致無邊愁儻如西方說寧  
道鐵圍囚不知公英靈久矣清都遊

弔張道從

風俗久頽壞人物無軒昂夫君抱貞質卓卓誠所長千  
牛解寸刃萬象窮智囊獸羣走麒麟鳥族鳴鳳凰炎政  
忽中微權姦肆猖狂彊敵乘釁起垂涎睨蜀疆君持山  
南節武略見鋒鋌坐令兩蜀口飛鳥莫敢翔坤維倚長

城老稚日以康誰謂波濤際中流失舟航悲風揚丹旄  
觀者淚浪浪丈夫事則已可為邦家傷緬知忠烈在報  
國猶未忘

胡夫人輓詞

士夫惜名節楚楚空衣冠寧如武陵孀守義人所難哀  
哉禍變仍歸櫂危狂瀾至誠泣蒼穹雙櫬果平安塔前  
三珠樹豈但馥芝蘭科名一一收平步簫廣寒方為反  
哺烏風木悲珊珊慶弔一何遽聞者鼻辛酸千年懿德

馨翠琰立巔岼英靈滿乾坤莫作長夜看

栽梅

平生不愛花獨喜雪中梅江皋無人問移近小亭栽連  
朝勤灌溉的皪犯寒開青枝綴瓊粒絳萼扶冰腮奇哉  
出羣姿不待春風媒調羹貪結子碎玉點蒼苔

師吉甫探梅二首

花如霧中見百念已灰槁愛梅習氣深興發霜冬杪行  
行步江郊恰似兒童小榮枯能幾時日月疾過鳥獨立

望南枝村空人悄悄何似東皇駕今歲來不早忍令瑤  
臺姿冷落羣芳後欲寄同心人不折門前柳

吏塗牛馬走未老顏色槁歸來隱林垆富貴輕毫杪前  
村梅樹芳點萼紅猶小問訊疎籬邊側聽迎春鳥春工  
有先馳一浣憂心悄寒梢未粘玉攀折嫌太早吹香定  
重來宿留嚴冬後明朝韶景妍更不齒花柳

落梅

名園探梅時粉苞才半開如逢姑射仙偃蹇下瑤臺孤

潔自天賦肯聽東君媒別來今幾日雪片點蒼苔玉笛  
誰家子噴月一聲哀可惜飛幽館不上美人腮柳條忽  
萌動春風原上回芳菲已後時百卉胡顏哉轉首鴨鵝  
鳴殷紅亂成堆却來綠陰下青子薦瓊盃

次韻杜安行見寄憶梅之什

穠華桃李容不染雙眸淨唯有愛梅心夢中行庾嶺安  
得移瓊林月下對清影坐想冰雪姿蕭然幽興永我欲  
從君游羈絆未能騁平生溪山懷倥傯迷簿領

次韻友人寄牡丹

我居不識春春至驗鳥語誰知有芳叢遠在幽人墅千  
葩籠霧縠萬朵羅烟縷盛開笑白日半落啼紅雨餘花  
自臣妾天公費機杼賞翫應亡厭分來儻相許穠姿忽  
在眼微馥驚穿戶初觀但妖韶細看尤媚嫵尚想壓枝  
態未易此間伍何當就花飲不憂腸腸腐

池蓮

疏池養白蓮故作夏時景田田綠初齊便成清淨境雖

無藕如船風味同玉井水仙何處來露浥晨妝靚苦乏  
社中友永日對孤影爽氣入人懷醕酹為之醒

瓶水生數花須臾有蜂來集感而賦詩

折花養瓶水老眼聊自怡案置須臾間游蜂已著枝嗅  
香起還泊翳翳動天機不知何方來神速乃如斯宇宙  
一氣通萬類不相違石虎沒勁矢竹龍化清陂矧茲抱  
靈識倏與吾心期吾心未專寂舉念物先知千生風輪  
轉都緣愛欲移勉哉學坐忘宜默同木雞無中產物象



顯晦隨所之超然合大空鬼神莫能窺

諸公詠竹以籠竹和煙滴露梢為韻得滴字

草木盡柔脆夫君抱剛質孤標老更高翠葉秋仍密伊  
余亦剛介論交自疇昔相見眼終青直諒蓋多益夕陽  
映雪低曉露和煙滴清修良起予安可無一日柳條但  
柔姿桃李從令色與君期歲寒勿作春風客

洗竹

林茂竹太繁汙穢在眼底枯筠與弱幹茲辰為一洗萬

竿何足惜惡盡意乃已其餘擢青青玉立比君子姿色  
秀可餐莫道膏粱美我來不忍去日日對園綺

柳絮

柳條初弄綠已覺春風駐而今二月尾滿路團飛絮人  
生安足恃忽忽朱顏去飄零未肯休萍泛知何處見之  
動中懷欲寫無佳句歸來宴坐餘悠然得深趣

有野人來獻石蟬以二千錢償之因成拙詩

二儀肅陰氣草木凋零盡爾生巖石間叢密不自隕綠

葉抽紫莖族與秋蘭近蟬聯無數花未覺霜飈緊野人  
持獻余千金那敢吝盆崖遂物性暢茂庶可準吸風噴  
芳馨飲露含清潤如聞嘒嘒聲滿地寒林振

詠龜

泥塗曳尾行自適幽閒性不食本無營畏人長縮頸緬  
思風雨秋汚池亂鼃黽爾亦水中族胡為獨沈靜異質  
天所賦巢蓮千歲永見夢固不祥多知慎所逞

蛛網

我觀昆蟲輩汝形亦甚微吐絲織為網元自有真知團  
團肖車輪巧妙出天機事成坐其中功力不浪施羽飛  
纔一觸胃罌定無遺正緣有此生謀食以療饑古先大  
智人創作萬世規為民設佃漁結繩乃效之仲尼善詞  
說姑言取諸離制器尚象耳一一非妄為

同蕭憲父明舉聯句

案聯句一首原本  
未曾分注人名

今夕復何夕邂逅得良集雲消夜氣澄月住秋空碧南  
窗一樽酒耿耿寒光入浩然起長歎矯首望東北天涯

清景同誰謂關塞黑躊躇反傷懷衰草露蟲泣

欽定四庫全書

雲溪集卷六

宋 郭印 撰

七言古詩

和許守豐年行

園林搖落露寒梢，秋成穰穰彌四郊。  
千里播種無不毛，妻兒溫飽忘啼號。  
餘粒施及禽與獠，有田寧復棄而逃。  
太守牧民如牧馬，宣化承流王澤下。  
欲希禹稷事躬稼，墾畝勸耕謾隙罅。  
鋤名杜蘅黃乃其，亞黃雲泱漭覆原野。

樂爾豐年醉瓊竿古邛舊敝人人說久困征誅心已折  
析家蕩產紛更迭身罹罪罟無從雪漫道當時富鹽鐵  
漢志食貨忍重閱嗟我婦子難全活今年誰料勝常年  
入絹得鹽償本錢里絕追呼俗自便閉門稚耄得安眠  
十日一風五日雨鄰村稽首羨茲土白頭半刺才竄苦  
賴此賢侯百廢舉空庭吏散鳥馴除謠聞擊壤同康衢  
侯於公卿地有餘利澤行推遍海隅嗚呼利澤行推遍  
海隅坐使斯民愁歎為嬉娛

和晁子西鈴屬勸農長篇

使君誠意與天開呼吸之間為雲雷一朝命駕出郊次  
遠近爭看髦節來道邊草木盡翔舞巴峽邇來和氣聚  
祇從精禱召神靈五日一風十日雨不有前時愁歎聲  
千里相聞雞犬鳴荷鋤耒舉家出原野處處催深耕  
聞說朱幡閱田圃老稚提攜紛笑語當時情游今力穡  
肯播肯菑勤子父朝廷睿澤浸華夷良牧承流上所知  
我欲濡毫頌公德自慚蕪累不成詩



故人蒲朝達沿檄道經廣漢留連累日作詩為

別

憶初鼓篋虞庠日識面乃喜文章伯游從不覺化芝蘭  
交契懸知定金石蕭條離緒十秋風天涯等是飄零客  
雙鱗不到雁無來月照庭空心若失豈期此地忽相逢  
津津喜氣眉間溢口談詩書尚細事滿腹包羅濟時術  
轅駒局促思千里筴鳳歲蕤空六翮升沈世態且勿論  
執手臨風長太息君今清名塞宇宙指日雲霄看騰軼

平居謹議或可施肯效無功饗祿秩

別字文季蒙

調羹休羨最南枝國香繼踵開醅醖先容豈藉早梅力  
到了自結束君知孤芳繚繞春雖晚典型題在黃金醖  
一家風骨端不凡故使天公獨青眼中興英主方急賢  
屢辭溫詔挽不前平生忠赤照肝膽危論鯁諤能迴天  
左蜀分符尚餘略浙路霜臺亦輕著朝廷鼎鼎席尚虛  
君家況是箇中脚寒儒筦庫埋晨昏欲排閭闔嗟無門

洗眼江淮看騰踏妖氣一掃清乾坤

送李去病赴召

五嶽四瀆今異方東西南北衣冠鄉  
巽維久挽六龍駕江浙人物無遜藏  
參井之區最遐僻步武難依日月光  
吾皇側席佇賢俊紫泥屢下勤搜揚  
蜀士肯來天顏喜一一引對羅周行  
烏羣鸞鳳負超詣臺閣禁從森翔翔  
君今再召歛幡改愛主憂民心未忘  
波瀾浩蕩江湖闊忠信唯將一葦航  
十年世故已熟講不到帝所難鋪張

當今國病入骨髓願君審處囊中方參苓芝朮固美矣  
瞑眩之藥方為良扁鵲名世解說死華佗活人須浣腸  
君其持此拯危急祛除痼疾針膏肓一身安榮豈足道  
要與四海同康強

送杜安行東上

憶初謀食廣漢城同時偶得三益友心將金石許平生  
但笑紛紛翻覆手人言兄弟性稍異朝暮追隨祇詩酒  
而今星散各參辰空餘孤月照窗牖少城咫尺有張侯

素書頻得問安否蒲節三月不廝見夢繞錦屏山下走  
更憐吾子別經年幽懷鬱鬱無由剖况茲來書又東去  
萬里嚴風吹馬首朝廷多事正求言自負應云舌在口  
力陳時策瘳邦國肯與寒儒較先後男兒立志豈尋常  
要使高名齊北斗一科一第奚足道富貴浮雲非我有

送王吉先兄弟赴試

我聞迺翁學汪洋曾游桂窟攀天香青袍藍縷窮益剛  
更無黃金遺諸郎大兒氣質和而莊腹有詩書言有章

仲子標姿何昂昂頗聞論議生鋒鋌兩君遊戲翰墨場  
乘風鼓翮相翱翔飛上天庭仍引吭俯視諸子如蜩蟬  
原缺一字華煜煜春揚芳綰綬歸來慰北堂坐令門地增輝  
光

送莫少虛赴省試

莫君江南佳公子才華秀拔春蘭馥少年意氣壯虹霓  
豪邁不入時人目酒量逡巡百盞空詩鋒頃刻千毫禿  
我從識面已忻慕每恨往還心未熟官同古雒豈偶然

一見相忘倒甕腹談道論文俱入妙夜闌燭短頻更僕  
聖處玄微得我疑君獨心通如破竹要將土苴活邦家  
條上封章抵車軸嘉謀讜議期見用不學賈生空痛哭  
行行提筆戰春闈篋中尚有三千牘科名唾手真餘事  
力轉天迴迺民福當今公道青雲平忍埋光采甘沈陸  
欲隨君往路無繇只欠雙輪來插肉殷勤別酒休辭醉  
馬已就銜車已輓蜀山崎嶇秦甸寒屈指深冬到輦轂  
焚舟計決攜家去努力加餐此為祝

當可以邑士將赴類試作詩餞之因效其體

丹山采鳳羣鳴集雲外舒張覽輝翼錦屏相望不千里  
音中簫韶有人識朝家選舉專一科翰墨之工拔士多  
好將筆力覲天巧幹旋正氣回狂波鯨鯢未翦龍移宅  
吾皇饑渴人材得雕蟲小技何足論要吐胸中濟時策  
吳山遼邈天門高尺紙輸忠氣自豪程文奏御宸心悅  
青紫紛紛換白袍

陪程元詔文或李久善游漢州天寧元詔有詩



見遺次韻答之

四海豈無兄弟親氣合行須同父母相逢坐語忽移時  
不覺朝飡輒過午品評人物妙雌黃議論邦家入覲縷  
危言齧舌久自吞幽憤填膺欣欲吐字字珠璣落齒牙  
篇篇錦繡裁膏肓已驚大敵森戈矛端笑羸師卧旗鼓  
憐君風韻過諸王顧我才情非小杜何當再訪南歸僧  
不恥更問西來祖欲登塔級挽晴雲更試茶甌潑新乳  
平生識面有千百屈指論心無四五偶然流水遇知音

為抱焦桐弄宮羽

感時一首再用前韻呈元詔久善文或

我傷天缺無人補四海嬰兒失其母北人躍馬渡黃河  
請和使者空旁午二君北去宗族從國祚千鈞垂一縷  
天心保趙有真孤重雲翳日今復吐萬姓謳歌子啓賢  
沈痛脫然離肺腑聞招賢士築層臺更納直言懸諫鼓  
彌縫輔贊要真儒相國豈無房與杜中興之主信非常  
睿武英明如太祖巍巍虞舜有重瞳穆穆文王生四乳

鑾輿若返天下安未說登三并咸五咄嗟廟堂不須憂  
行看兩陛舞千羽

次韻李智淵暮行湖上

晚涼曳杖尋幽絕怪樹相逢如磬折縈紆小徑渾路迷  
突兀高亭補林闕襲人暗遞竹間風延客長明波底月  
游魚適性頻往來歸鳥呼鷗弄清越避炎終夕見天真  
脫巾露頂脚不韞

和元汝功江樓待月

危樓百尺閒臨水玉宇無雲天萬里悠悠山月湧晴空  
舉頭拭目增歡喜魚龍何處深避藏影落澄江清徹底  
欲揖嫦娥上廣寒古來遭遇應無幾吾心空洞與物齊  
視我如人人如豕那堪河嶽盡播遷富貴功名心已死  
世衰俗薄異炎涼只有高人興味長此時此樂何不賞  
瞥眼餘生飛電光

中秋待月以星辰避彩乾坤靜為韻分得避字  
大火西流金用事四海八荒蟠殺氣風淒露冷雨泠泠

草木山川遍憔悴天公有眼老亦昏妙手憑誰刮雙翳  
一年佳月在今夕可奈太清雲點綴大威神力宰官身  
開闔陰陽本游戲晚來微念入何許頃刻氛霾變澄霽  
坐客驚起一凭欄三峨新掃脩眉翠瑤臺飛鏡貼寒空  
流水無聲光滿地明吞萬象却星辰影落千巖走魑魅  
樽壘預設衆初疑喚得嫦娥乃容易良夜沈沈桂樹高  
興發却嗟清影駛此時此樂不長有一醉已拚那敢避  
更闌酒盡東方白望舒迤邐還歸轡我欲從之上廣寒

挹取金波洗塵世

和元守中秋月夜韻

曩為癡兒未識月夜明  
喚作山陰雪翻笑老人立其下  
皓彩亭亭映華髮  
晦朔弦望總不知  
三五那能問盈缺  
有時暮宿招提境  
插天不愛金銀塔  
壯年觀覽稍好奇  
眼看絕景一何稀  
中秋翫月定忘寢  
往往連夕追輕肥  
歡呼共吸盃中影  
旋瞻寶鏡天邊飛  
欲速嫦娥下霄漢  
論心執手與同歸  
老來愛身如愛國  
暑氣蘊隆驚吏酷

況當夔子瘴癘地白露溥空尚蒸溽可憐今宵月色涼  
灑灑寒光滿坑谷不論貴賤及富貧茅屋朱門皆變玉  
我亦乘興上層臺但無佳客同尊罍坐久歸來略假寐  
牀前見月枕還推不知此夜為誰好一曲長歌動九垓  
人生窮達何足算但把餘齡付酒盃

和程文或九日詩

平生懶惰無拘逼學道唯將寸陰惜手披目覽不自勤  
俯視仰觀如有得王侯蝼蟻同丘墟身外紛紛了無益

况值秋風草木枯，仍驚羽檄文書急。  
蕭條情思殊曩時，畏見重陽百憂集。  
花披黃金豈復知，酒送白衣元未識。  
計侯開筵及芳辰，置我坐隅非惡客。  
衰顏不紅鬢失青，一笑頽然倚歡伯。  
醉來說禪傍無人，若道箇中嫌揀擇。  
古今一照事俱空，物我兩忘心自適。  
明朝梅福記新詩，鏘鏗未減金聲擲。  
何如邀我卧東籬，天地從教為幕席。

積雪

一夜蕭蕭灑竹聲，漏水未殘天忽明。  
初疑落月照東榮，



樹雞烏鵲紛紛驚起來積雪爛中庭窪陷汙穢悉已平  
海水飛波上棟甍萬瓦堆鹽一尺盈此身恍若游天京  
銀樓玉闕爭崢嶸仙人想見冰霜清園林草木皆瑤瓊  
尊中有酒且細傾農家活計在深耕明年歲事欣已成  
且把賦餘養殘齡天邊日望隕欃槍

時升詠雪禁體物矣而彥序復為之取韻尤嚴  
勉強攀和

朔風吹空高岡裂忍凍幽人心似鐵今朝雲色一天同

片片如筵墮濃雪影搖寒水照瞳眴聲瀉黃蘆聽騷屑  
澗谷凝時麋鹿死園林壓處桑榆折乃知造物本均平  
高下不論凹與凸登臨四顧浩漫漫千村萬落青烟滅  
憶昔子卿使匈奴不拜穹廬何勇決漠北酸寒十九年  
鬢鬚脫盡形容藹故人今亦在窮荒高風凜凜皆傳說  
鴻雁南來好繫書應念邦家五情熱

眉州太守劉公忽於池中獲東坡所作遠景樓  
碑鄉人費洪雅有詩美之因率同賦次其韻

東坡淪沒文委地藝圃書林荒不治遺編禁錮學無師  
木不從繩金失礪高樓遠景尚崔嵬妙琢雄詞非骯髒  
幾年困厄在汚池照夜寒光空水底有如鐘磬傳不朽  
壁間字字搖科斗雷霆破蟄里耳驚龍蛻蟠泥神物守  
豐城劒氣異青黃一遇雷公難祕藏僵碑植立豈偶爾  
文章政事兩熒煌舊俗千年蒙教化濯以江漢暴秋陽

題史元量芳潤堂

并序

丹陵史元量於所居之堂萃書其中俾二子習焉取

陸士衡所謂漱六藝之芳潤以揭名遠來求詩為作  
數語

聖經杲杲日翔空元與後學開愚蒙著述成書不得已  
令人誦習知吾宗辭文旨遠非外至一一流出自胸中  
如木有根水有源敷榮浸漬乃無窮此道含靈悉具足  
聖人庸人心本同如何異見立仁智百轍千歧礙不同  
尋枝逐派遂忘返癡兒失路迷西東豈無達者為拈出  
抉剔衆瞽矧羣聾史侯名堂深意在眼懸明鏡磨青銅

欲將妙義示當世豈獨用訓垂髫童我初聞之喜擊節  
心心相照密沖融作詩粉飾雖贅語要令萬古還淳風  
普慈學官何子固廨舍有溪月軒明復留詩用

其韻

碧霄桂影墮寒溪賞心正與幽人期憑軒一俯吟思發  
雕肝鏤肺成新詩水流月出咸自爾去來休論東與西  
句中之眼落第二紛紛名字俱人為胡不反觀自己月  
照耀古今無遷移有客問我月安在天上人間總不知

光吞萬象竟何有一語誑人真自欺我欲提此吹毛劍  
戮盡叢林多口師

忘機臺

累石成臺如蟻垤對此澄江千丈闊春輪旋轉疾如飛  
隔岸傳聲無間歇風標公子鏡中來為我沙汀凝片雪  
晚晴更是斜陽好樹外殘霞紅一抹平生任運息機心  
麋鹿可馴禽可狎生憎智巧犯人為激水翻車真太黠  
君不見海上之鷗胡不下當時妄念差一髮又不見漢

陰抱甕用力多區區反笑桔槔拙我今與物既大同積  
劫情塵俱泯絕天機密契有誰知強立臺名太饒舌

讀易一首簡劉韶美

學易不識日月魂盲人展轉誤銅盆分陰分陽發天祕  
羲文孔子同一門頭童習之老鬚髯熙熙未夢春臺登  
一朝索得乾坤蘊豈但潛龍及履冰與君細評寶花紛  
只恐鬼神潛聽聞

說禪一首簡劉韶美

小知小見弄精魂正似醯雞居覆盆茫茫大道絕南北  
六通四闢初無門不離當處遍高深誰謂如天莫可登  
世人聾瞶喚弗應執熱為火寒為冰雷霆蟋蟀一竅均  
觀音不在耳邊聞

劍篇次元汝功韻

陽金為魂陰為魄百鍊寧容垢膩蝕出匣風雲凜凜寒  
觀者堵牆皆辟易發矟利刃思一試佩刀匕首都棄置  
鯨鯢戮盡四海清英豪始慰平生志長河喬嶽暗風沙



金匱要略卷六  
高山大澤蟠龍蛇君家自有尚方賜不須嫉世空吁嗟  
操舟渡江勿虞破中流斬蛟平地過天下蒼生奈若何  
安石且起東山卧

月下觀梅寄蒲大受

東君嚴裝行駕車天遣此花為前驅粉苞五出絳蠟趺  
犯寒獨逞冰雪膚幽園邂逅疑仙姝香颺馥馥浮襟裾  
天邊流月光彩舒素娥下與論鉛銖遶樹顧影空踟躇  
清賞恨無佳人俱一枝遠贈意何如聊寫殷勤當尺書

蘭坡

梅花掃迹春無光，繼踵惟有幽蘭香。  
天姿沖澹謝朱粉，睥睨百卉皆優倡。  
高人採擷紉為佩，養之盆盎移中堂。  
微風馥馥來何所，一干鼻觀尤非常。  
年來屢遭白眼笑，過而不顧夫何傷。  
深山窮谷遂真性，寂寞無人亦自芳。  
憶昔靈均滋九畹，貞潔內守甘退藏。  
衆醉獨醒隘八表，回視俗物都茫茫。  
我今日暮前途窄，握香不羨尚書郎。  
荒坡滿植作知己，從茲身世兩相忘。

和時升種竹韻

何物比君子猗猗庭前竹直節虚心人不顧高標雅態  
自殊俗千畝碧雲雖未有數竿清風也自足興來尋訪  
不知懶到處敲門忘檢束身居市廛心在野山林痼疾  
今彌篤直舍初開露井寬檀藥只欠森森玉君詩贈我  
何相知攝衣起謝容正肅緬思竹林賢自昔高品目當  
時昏濁亂一世七子風流豈容黷衆人皆醉我獨醒正  
似霜筠異羣木不妨糟丘寄孤根秋風相伴傾寒醪煩

君更作長短句為我商聲歌此曲

次韻杜永年東齋種竹

王郎英骨今已枯風流聲名渾未除結交斯人千載上  
唯君執手同登車平生愛竹遂成癖竹間醉倒無人扶  
今日君醒竹還醉區區手植不暇鋪頗懷種柳陶尹令  
更慕滋蘭屈大夫況復此君尤灑落幽齋安可一日無  
塵埃極楚縱未免入門一見心自蘇是中真樂難語俗  
耳目已謝聲色娛中虛自有天遊地應笑谿谿紛婦姑

竹葉問君能造否何時餉我一樽酒

茶詩一首用南伯建除體

建置茗飲利無窮除去睡魔捷如攻滿篋龍團重絕品  
平視紫笋難為同定知一啜爽神觀執熱往往腋生風  
破碎月輪午窗底危冠欲墮呼樵童成仁豈憚粉身骨  
收取祛煩療疾功開陳作經憶桑苧閉眼便覺精神通

食蝦蟇詩

蝦蟇胡為亦水族形貌百醜誰爾憐天陰雨濕得快意

鳴聲呶呶何器喧才離泥淖矜跳躑脚手那解高攀緣  
一時蠹蛤結儔侶紆青拖紫紛駢闐漁童網罩入市賣  
疵磊成串不論錢有客殷勤勸我食犀筋未下嫌腥羶  
煎膏輒玉定虛語獬犬所傷或可痊天生此物苦無用  
汙穢陂池宜棄捐如何月窟亦容汝時放饒口傷清圓  
我願蠹氏灰灑無噍類免使成精飛上天

